



Sud Bosne i Hercegovine
Суд Босне и Херцеговине

Broj: S1 3 Iž 038404 20 Iž
Sarajevo, 27.10.2020.godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Mirsade Džindo kao predsjednika vijeća, Zvezdane Antonović i Vesne Trifunović kao članova vijeća, odlučujući o žalbi žalitelja Milomira Đokića, Hilendarska 45, Ugljevik, Bosna i Hercegovina; Mišo Đokić, Ive Andrića 17, Ugljevik, Bosna i Hercegovina; Ljiljana Đokić, Ive Andrića bb, Ugljevik i Dragan Đokić, Ive Andrića bb, Ugljevik, Bosna i Hercegovina izjavljenoj na odluku Centralne izborne komisije Bosne i Hercegovine, broj: 05-1-07-1-997/20 od 01.10.2020.godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020.godine, na nejavnoj sjednici održanoj dana 27.10.2020. godine donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđen je i objavljen broj birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na kojem spisku se nalazi i žalitelji.

Žalitelji su protiv navedene odluke blagovremeno izjavili žalbu navodeći da se njihova imena izbrišu sa spiska glasača iz Srbije, jer godinama rade u Švicarskoj.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci kao nedopuštena ili odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu, Centralna izborna komisija BiH je, prije donošenja ožalbene odluke, a prilikom razmatranja prijave dostavljene dana 25.08.2020. godine putem e-maila na ime žalitelja, utvrdila da su dostavljeni obrasci prijave za glasanje izvan BiH za Đokić Milomira, Đokić Dragana, Đokić Ljiljanu i Đokić Mišu uz koje su dostavljene kopije ličnih karata za imenovane. S obzirom da su prijave za glasanje izvan BiH ispunjavale sve uslove propisane odredbom člana 3.15 Izbornog zakona BiH, žalitelji Đokić Milomir, Đokić Dragan, Đokić Ljiljana i Đokić Mišo se nalaze na izvodu iz Centralnog biračkog spiska za glasanje izvan BiH iz Srbije.

U cilju potpunog i pravilnog utvrđenja činjeničnog stanja, imajući u vidu da je navedena žalba dostavljena putem e-maila, da ista nije potpisana i da žalitelji nisu dostavili niti jedan dokaz kojim bi potkrijepili navode iz žalbe, Centralna izborna komisija BiH je zaključila da se radi o zloupotrebama biračkog prava, te da žalba nije osnovana.

Naime, u konkretnoj situaciji nesumnjivo se radi o zloupotrebi biračkog prava, međutim, Centralna izborna komisija BiH na osnovu raspoloživih činjenica nije bila u mogućnosti utvrditi ko je počinio zloupotrebu biračkog prava za glasanje izvan BiH, jer je zloupotreba mogla biti učinjena, kako od strane žalitelja, tako i od strane trećih lica. Međutim, u svakom slučaju žalitelji će biti u mogućnosti da iskoriste svoje biračko pravo i da po želji glasaju na svom redovnom biračkom mjestu u Općini Ugljevik, BiH.

Žaliteljima će, ukoliko na dan Lokalnih izbora 2020.godine dođu na redovno biračko mjesto određeno prema njihovom mjestu prebivališta, biti omogućeno da glasaju nepotvrđenim kovertiranim glasačkim listićima (član 5.18 Izbornog zakona BiH) koji će biti potvrđeni i prebrojani u Glavnom centru za brojanje, s tim što će Centralna izborna komisija BiH u Glavnom centru za brojanje izuzeti glasački materijali dostavljen eventualno i iz inostranstva na ime žalitelja i isti neće biti ponovo prebrojani, a sve u cilju spriječavanja zloupotreba biračkog prava i omogućavanja ostvarivanja biračkog prava biračima kojima ono zaista pripada.

Prema odredbi člana 5.18 Izbornog zakona BiH, ako se ime birača ne nalazi na izvodu iz Centralnog biračkog spiska zato što se birač upisao u Centralni birački spisak da glasa izvan zemlje, a vratio se da glasa lično u Bosni i Hercegovini, njegovo ime dodaje se na poseban obrazac koji sadrži sve podatke kao i izvod iz Centralnog biračkog spiska. Birač se potpisuje na izvod i ima pravo glasati nepotvrđenim-kovertiranim glasačkim listićem, u skladu sa odredbama ovog zakona.

Slijedom navedenog, apelaciono vijeće je ocijenilo da se pobijanom odlukom Centralne izborne komisije BiH ne povrijeđuje biračko pravo žalitelja.

S obzirom na izloženo, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A

Mirsada Džindo